



धृत्पुत्रमन्त्रदयसुत्रं



南無本師釋迦牟尼佛

南無西方三聖阿彌陀佛. 觀世音菩薩. 大勢至菩薩

般若波羅蜜多心經

觀自在菩薩。行深般若波羅蜜多時。照見五蘊皆空。度一切苦厄。舍利子。色不異空。空不異色。色即是空。空即是色。受想行識。亦復如是。舍利子。是諸法空相。不生不滅。不垢不淨。不增不減。是故空中無色。無受想行識。無眼耳鼻舌身意。無色聲香味觸法。無眼界。乃至無意識界。無無明。亦無無明盡。乃至無老死。亦無老死盡。無苦集滅道。無智亦無得。以無所得故。菩提薩埵。依般若波羅蜜多故。心無罣礙。無罣礙故。無有恐怖。遠離顛倒夢想。究竟涅槃。三世諸佛。依般若波羅蜜多故。得阿耨多羅三藐三菩提。故知般若波羅蜜多。是大神咒。是大明咒。是無上咒。是無等等咒。能除一切苦。真實不虛。故說般若波羅蜜多咒。即說咒曰：

揭諦揭諦 波羅揭諦 波羅僧揭諦 菩提薩婆訶
 揭諦揭諦 波羅揭諦 波羅僧揭諦 菩提薩婆訶
 揭諦揭諦 波羅揭諦 波羅僧揭諦 菩提薩婆訶